

Die lieben Abkürzungen. Ein Abend im „Moritzli“

De Präsi lüüet em MO aa ond frogt, was get's höt z'Ässe? Do seid de MO, das weisch du jo am beschte, du besch jo höt Obig im MO. Ou, jo, macht de Präsi. E de Jahreszyt entschprächend mached mier höt Nudle ond Spargle. Das schmöcksch der ander Tag au no.

Am haubi ahti schtot scho de ZM im Lokal. Är hed hunger wie'ne Cheib. Vo dem gruusige Gsöff hani jetz de glii gnueg. Ond abgno hani au no fascht nüd. Jetz mues i öppis rächts z'Ässe haa. Vermuetlech hät är lieber e Mocke Fleisch ghaa.

Glii drovabe lüttets, de ZH chont elei. Är hed T deheime gloo. Es Bier bitte, rüeft är em Präsi zue.

Schlag of Schlag träffid d'Lüüt ii. De VKP mit siinere liebe B, de TK mit em R, d'C esch au elei, de GV mues zom Hond luege. De ZH frogt d'C, chont de PC au? Weisch es esch wäg de neue P. Nei de PC esch deheime am GV, äch nei, omgekehrt de GV esch deheim am PC. D'SM met em E send au no grad iitroffe. Sie chont emmer vo ergend öpperem es Briefli über. (Zom iizahle natürlech)

Z'letscht chont no de Vice dör d'Schtäge uuf z'chiche. Das esch keis Problem, das mach ech scho. Ech weiss zwar ned was är gmeint hed, aber dä esch e so.

Plötzlech esch es e chli ruhiger worde im MO. De Präsi cha au e chli go abhocke. Jede hed z'trenke vor sech ond esch z'frede. Mer redt so über s'eint oder s'ander. Niemer wo driiredt. E richtig gmüetlechi Rondi.

Plötzlech got's wede los. De ZH rüeft noch eme Kafi met Bätzi. Wie nes Lauffüür macht die Bschtellig d' Rondi. Eine noch em andere wot au es Kafi. Seckle Präsi!

De Vice potzt no d'Pfanne uus, är hed deheime nämli no nüd g'ässe.

E schöne Obig im MO god em Ändi zue. De MO got z'frede hei go s'Gäld zelle, ond de Präsi hed au es schöns Trenkgäld gmacht.

De Hondehüeter, GV, PC ond WB 2015

Legende:

Präsi (Präsident)	Vice (Vice-Präsident)
VKP (Vergnügungskomitee Präsident)	ZH (Zeugherr) dä hed de schönscht Tschopp
GV (Geistlicher Vater) oder Gesellenvater	P (Plakette)
PC (Plakettenchef)	SM (Säckelmeisterin)
TK (Tintenknecht)	MO (Moritz, Moritzli)
B (Bernadette)	C (Claire)
E (Edi)	R (Roli)
T (Theres)	ZM (Zunftmeister)